

Karikiriki wa go thapiša baloi

Mongwadi ke Robert Muponde | Diswantšho ka Elizabeth Sparg



Go be go na le mokgekolo yo a bego a dula a le tee ka ntlwaneng motheogeng wa thabana. O be a etelwa ke baloi bošego bjo bongwe le bjo bongwe. Ba be ba mo etela ba nametše diphiri. Maribiši a be a direla baloi seetša tseleng ka mahlo a ona a magolo a go kganya.

Ka mehla ba be ba dira lešata ba betha lebati la gagwe go fihla ka mahwibi. Diphiri di be di sega bošego ka moka mola maribiši a ngapa marulelo a bjang. Baloi ba be ba goeletša: “Ke kgale re sa hlwe re namela mokokotlo wa mokgekolo. Etšwa!”

Mokgekolo o ile a thoma go lla a bitša badimo ba gagwe gore ba mo šireletše. Baloi ba ile ba dira phathi ye kgolo ka jarateng ya gagwe. Ba kgeitši diaparo tša bona gomme ba bina mojakong wa gagwe. Ba sepetše fela pele ka mahwibi. A baloi ba bantši, ba ba šoro šoro!

Selo se sengwe se ile sa loma monwana wa leoto la mokgekolo.

E be e le legotlo, leo le bego le phela le tsena ka lešoba la lebotong. Ke gantši, mokgekolo a le tšhelelampholo efela le sa hwe. Legotlo le ruri!

O ile a tšea seeta, efela pele a ka le hlasela, legotlo le ile la bolela. “Mokgekolo wa morategi, ke tla fa go loma monwana wa gago ka khutšo. Gase wa robala, mašego a mantši. Bjale, o palelwa le ke go ya go šoma mašemong a gago. O tla hwa ka tlala ka ntle le ge nka go thuša. Mokgekolo wa ka, ke na le leano!”



Ka ge a hloka thušo, o ile a kgopela legotlo gore le hlaloše.

“Ke ile ka sepelela leweng letšatši le lengwe gomme ka bona mehlala ye megolo ya Karikiriki, mmolai wa baloi wa go makatša,” a realo legotlo.

A botša mokgekolo, “O swanetše go tsena ka leweng bošego, o le tee o se wa apara dieta, o bitše leina la Karikiriki gararo, gomme o bine ge o etšwa.”



Mokgekolo o ile a etela lewa gomme a dira se a se boditšwego ke legotlo. O ile a goeletša, “Karikiriki! Karikiriki! Karikiriki!”

O rile ge a tloga, a kwa mošito wa maoto ka morago ga gagwe. O ile a thoma go kitima. Maoto le ona a ile a thoma go kitima. O rile ge a lebelela ka morago, a bona phere ya maoto a magolo a mo šetše morago!

Maoto a magolo a ile a ema ka ntle ga ntlwana ya gagwe fao a bego a emetšwe ke legotlo. “Maoto fela? Ke Karikiriki,” legotlo la hlaloša.

Go ile gwa šegofala. Baloi ba ile ba rasa: “Ke kgale re sa hlwe re namela mokokotlo wa mokgekolo!” Ba ile ba thoma go betha lebati.

Gateete, Karikiriki o ile a tla a kitima go tšwa maswiswing. Karikiriki o ragile baloi dihlogong gomme ba wela fase, ba idibala.

“O se ba bolaye gona bjale!” gwa goeletša mokgekolo. O be a nyaka gore baloi e be makgoba ka tšhemong ya gagwe ka ge e le bona ba dirilego gore sekoro se kgame dimela tša gagwe. “Efela ge ba gana o ba bolaye,” a laela.

Baloi ba mathopša ba ile ba dumela go šoma ka tšhemong. Ba be ba tla dira eng? Efela ba be ba šoma

bošego fela. Mosegare o be o sa ba lokela; ke nako ya bona ya go hloka go robala yeo. Le gona, ba be ba tlwaetše go hlobola diaparo, ke ka fao ba bego ba kwana le bošego.

Mokgekolo o be a thabile. “Legotlo,” a realo, “ka ge o phološitše bophelo bja ka, nka se sa leka go go tšhelela mpholo. Ge ke bunne, o tlo hwetša mokotla wa mafela wa ja.”

Legotlo le ile la lla ka lethabo. “Ke tla no etela fela go tla go loma monwana wa gago e le segopotšo sa tša kgale, mokgekolo wa morategi!”

Maoto a Karikiriki a ile a bina ka lethabo. Baloi ba go go se thabe ba ile ba tšea megoma gomme Karikiriki a diša ba goeletši ba lebile mašhemong a matelele. Gomme diphiri le maribiši a a nyamilego ona? Di ile tša boela sethokgweng moo di swanetšego ke go ba gona.



Karikiriki wa go thapiša baloi

Mongwadi ke Robert Muponde • Diswantšho ka Elizabeth Sparg

Mehopolo eo le ka buang ka yona

O nagana gore kotlo ya baloi e bile ya maleba? Ka lebaka la eng o thekga seo/o sa thekge seo?

Dikgopolo tša gago ke dife mabapi le diswantšho tše di šomišitšwego ke mongwadi? Ke mang yo o naganago gore ke mogale go kanegelo ye? Ke ka lebaka la eng o kgethile moanegwa yo?

Go bona

Ke karolo efe ya kanegelo ye o naganago gore e tšhoša kudu? Ngwala sengwalwa se mo bogareng bja letlakala le legolo. Thala diswantšho go rarela sengwalwa seo se e swantšhetšago.

Go bala

Ke dikanegelo dife tše dingwe tše o di badilego tšeo di nago le baloi, dikgolomodumo, diphiri le/goba maribiši go tšona? O ka hwetša dikanegelo tše ntši tša Nal'ibali mo: www.nalibali.org.story-resources. Kgetha kanegelo ye mpsha ye o ka e balago. Kanegelo ye e swana le go fapana ka ditsela dife le *Karikiriki wa go thapiša baloi*?

Go ngwala

Ngwala tekodišišo ya kanegelo ye. Akaretša kakaretšo ye kopana le go bolela gore ke ka lebaka la eng o ka e šišinyetša goba wa se e šišinyetše babadi ba bangwe ba mengwaga ya gago le bao o ba fetago ka mengwaga.

Go dira dilo

Šomiša dipoleiti tša pampiri goba khatapokisi, pente le thapo go dira dimaseke tša baanegwa ka kanegelong.

Go bapala terama

Diragatša kanegelo o šomiša dimaseke tšeo o e dirilego.